

四庫全書

子部

欽定四庫全書

子部

榕村語錄卷六

詳校官中書臣閔思毅

編修臣倉聖脈覆勘

總校官進士臣繆琪

校對官中書臣王慶長

謄錄監生臣李廷讓

欽定四庫全書

榕村語錄卷六

大學士李光地撰

下孟

以通章文勢觀之既竭目力一節對章首離婁之明一  
節是一反一正文體今有仁心仁聞三節對為高一  
節俱是見先王之道之當遵耳

自記

以父子兄弟對君臣朋友則父子兄弟為主恩君臣朋

友為主義以父子對兄弟則親親仁也敬長義也

仁義智禮者性也事親從兄者道也性在內道在外性之理似乎虛而難見故指其實而可循者實對虛字不對華字只緣後段有樂字人遂不敢以之名性反以仁義智禮樂為道而以事親從兄為性此倒說也豈知禮樂是一件禮可以名性樂獨不可名性乎蓋禮之和樂處即是樂也記仁之實實字注中對華說如仁民愛物仁之華也而其實在事親尊賢敬長義之華也而其實在從兄某却

要就理與事上說仁義是理只有愛敬其實事却在  
事親從兄注特恐人將事親從兄認作性故以仁義  
為道畢竟仁義禮智樂是天命之性事親從兄是率  
性之道人因不敢以樂為性故說得支離不知吾性  
之中即禮吾性之和即樂中和可謂非性乎

所為所不為只是一事有兩面耳當其不為便有一面  
為的在當其為又即有不為的一面在不是兩事亦  
不是兩時如人走路一脚站得定便一脚動得有力

如坐在館中讀書屏却閑游襍好便分外讀得有精神大要擇之明則守之固守之固則發之果是此節正意人之分量有限材質不齊於理固有之然亦看所不為的分數何如果有天下不顧千駟不視本領則功業亦何足云若云智識自此可進材猷自此可充則是以不為為但取硜硜之諒者耳却小了擇守本領也

自記

自得非獨得之謂言其氣候既足渙然水釋怡然理順

自然而得之耳得是深造之功自得是以道之效

自記

夫子好觀水正是心源與之一般至誠無息孟子窺見的實處曰原泉混混不舍晝夜盈科而後進放乎四海有本者如是必有事焉數句正是如此心中放不下這件事正又不好忘又不好助長又不好綿綿不斷火候自到與夫子觀水同意

庶物上文禽獸在其內人倫即人之所以異於禽獸者也明於庶物察於人倫便是將人與禽獸所以異所

以同處無不知之之明至於由仁義行則所謂一視同仁篤近舉遠而處之當也

自記

不泄曰敬泄生於玩易也不忘曰誠忘生於間斷也

自記

文定謂邶鄘以下多春秋時詩也而曰詩亡蓋自黍離降為國風天下無復有雅而王者之詩亡矣某謂畿內之地亦有風謠雖西周盛時豈能無風王朝卿士賢人閑時念亂雖既東之後豈盡無雅只可以正變分治亂不可以風雅為盛衰也觀二雅體製不進於



頌東遷後猶有魯頌況雅乎然西周不見所謂風東  
周亦復無雅者意畿內醇美之詩悉附於二南以為  
正風而衰亂之風則別為王風而為變至雅之無東  
則序詩者失之也今觀所謂平王之孫齊侯之子赫  
赫宗周衰妣威之周宗既滅今也日蹙國百里明是  
王畿有正風東遷有變雅之證而說詩者穿鑿以就  
其例此正如成王不敢康噫嘻成王惟彼成康奄有  
四方明是成王康王緣說者謂皆周公制禮作樂時

詩遂以為非二王而別為解釋耳其可信乎此三百  
一大義不敢附和先儒而不闕所疑也況風詩是王  
者命太師採陳而行賞罰之典於春秋所取之義尤  
切奈何專以無雅為詩亡

自記

上二句三史之所同下一句則裁自聖心故講者多將  
上二句輕抹豈知夫子垂世立教不寓之他書而必  
修春秋蓋他書為空言春秋則有二百四十餘年之  
行事因而著其是非褒貶則比之空言者尤為深切

著明不是說夫子實行王者之事也書仍舊是空言  
但書中有許多行事在耳如此則事文兩字固不可  
輕畧況事是桓文王降而霸史是春秋周禮在魯俱  
隱隱與王迹事相關乃義之所由起也

自記

孟子所謂天子之事猶云天子之史也諸國皆自為史  
以記一國之事而夫子乃尊周故為天子之事問何  
言其事則齊桓晉文曰其事春秋之內事也天子之  
事作春秋之事也河陽之役晉文之事也天王狩于

河陽天子之事也所謂義也

其義其字亦非指詩亦非指春秋懸空對上兩其字說出是謂春秋中所有之義也畢竟此義是何處取來夫子亦未說破隱然是正王道明大法從三代盛王得來的

自記

曰侵則掠境未深曰追則歸師不遏故四矢禦亂而足以反命也使斯死黨背公則又何足為端人乎

自記

起句天下之言性也便隱然有許多智者在其意中蓋

敢於言性者皆其以智自命者也孟子言性說如此  
紛紛以我觀之亦但以故言便是了而已矣言不必  
深求也為其鑿也便是惡其以穿鑿言性雖行水一  
轉似是以行事言之然惟其見性之差是以行事之  
謬言行原非二物況禹之行水行所無事正言其深  
明水性非獨以行說也下節苟求其故求字亦是就  
知見上說

自記

以惻隱驗仁是以故言性也但惻隱必以孺子入井自

然生心者為據方得其真所謂利也若既參以人偽如納交惡聲之等則非利矣因有納交而惻隱惡聲而惻隱者遂據之以詆人性之仁非鑿而何

清植

文問千歲之日至曰說者多指前邊的厯元某意却要指後邊之日至苟求得前邊已然便以後千歲之日至可坐而致此章不曰吾之言性而曰天下之言性蓋謂告子荀子輩也天下人之言性也見不好人多便云性惡見有生來善生來不善者便曰有性善有

性不善見人可為善有改而不善者便曰可以為善  
可以為不善不知故者以自然出之者為本今夫水  
順流而下是故矣若過潁在山亦以為故則非矣所  
惡于智者為其鑿也鑿字對利字說行所無事則利  
矣世遠曰以此節言之語氣則得矣論通章則末節  
有苟求其故句仍以朱子說為順曰末節之故即包  
利字在內以第二節已說明也然難云苟求其利故  
仍曰故問日至自然是冬至曰不論冬至夏至總是

歷法得日至便都定了

自反而忠矣而曰於禽獸又何難焉便微有責人之意  
故章末復引舜以為準則蓋舜終身責已終無是我  
非人之見曰如舜而已矣則依然自反之初心也張  
子曰學至於不尤人學之至也便是此意

清植

齊人餽女樂孔子官亦不小不間上一諫章出一諍語  
而借燔肉即行何太愀然却得孟子發揮出來蔡虛  
齋以為孔子以小故而去自己擔著些不是正是他



不欲苟且而去以歸過君上處說得甚有意味如父  
母之不我愛於我何哉虛齋解云我竭力耕田不過  
是供我子職之常本無可以悅親者不得乎親不可  
為人不順乎親不可為子畢竟父母不愛我我將何  
以為人為子哉此方於而已矣三字有情說得怨慕  
意出大凡前輩解書雖不必盡當時有紆折處要是  
一團忠厚悱惻之心

其子之賢不肖皆天也天字似以氣數言天之所廢天

字似以天心言然要之皆氣數而天心存乎其中如堯舜之有敗子仲尼之不遇其君氣數之不幸也天心亦不得已而廢之夏商周繼世有人是氣數之幸也天心亦因而不廢之主宰之天與氣化之天是一是二此處要看得活

自記

以天下為已任自耕野時便如此所謂志伊尹之所志也不可單就應聘上看出自任

自記

前一豈若後三豈若時講說來竟似伊尹有兩箇舌頭

伊尹一片心腸只是以堯舜之道為主初時猶未卜得湯之果可與為堯舜否也則毋寧猷猷而堯舜之道自在及見得確信得過則又何如親見之為愈俱

是實情

清植

吾聞其以堯舜之道要湯未聞以割烹也兩間字亦是折之以理非據傳記說也

自記

謂金玉為鑄鐘特磬將作樂而擊鐘以先之樂終則擊磬以止之經中無此語惟注疏有之考虞書戛擊鳴

球商頌依我磬聲是磬亦所以始樂某思金玉恐即  
是編鐘編磬鐘磬有頌鐘頌磬所以綱紀人聲也有  
笙鐘笙磬所以綱紀笙聲也金石在八音中實為綱  
紀每一句以鐘聲領頭衆音皆隨之如鐘聲是宮羣  
音隨之而宮鐘聲長有餘韻韻將歇而磬以止之是  
謂始終條理鐘磬之鳴相去不遠每字每句皆有始  
終之義如孔子一言一動皆有始條理終條理如射  
然每矢皆有中有力無四鏃未發用一巧而四鏃既

舍用一力之理問如此說與集大成合否曰八音全用便是集大成註中一音獨奏蓋如取瑟而歌擊磬于衛之類然非作樂樂則無一音獨奏之時問或逐字逐句用編鐘編磬起調畢曲用鎛鐘特磬亦未可知曰要有憑據方好鐘鼓奏九夏始用鎛鐘朱子或沿古人成說而用之然不可解

大國地方百里積實得一萬里也七十里者積實惟七  
七四十九得四千九百里是於大國殺十之五而強

五十里者積實惟五五二十五得二千五百里是於

次國又殺十之五而弱

自記

交際章前說交際後說行道似不相照應然却有關通之意聖賢之交際不嫌委曲通融者總是汲汲行道欲以濟世也為之兆朱子說得是是聖人自示以道可行之兆即指獵較既示以兆而不行而後去是以未嘗有所終三年淹也今人都說是見道有可行之兆為之二字都解不去朱子解見行可云見其道之

可行解際可云接遇以禮如此是見可行不是見行  
可可際不是際可見行可是自見行道之可非累世  
不能殫道大不能容也際可是自見交際之可非絕  
人逃世不近人情也見行可或可謂之仕至際可公  
養亦謂之仕者總欲仕也皆是解為之兆公養乃是  
饑餓於我土地周之亦可受也免死而已然使出公  
委國以聽夫子即為之正名定分而且為東周矣此  
二段皆與前交際相應凡文章未有不前後照應者

孟子尤然如養氣章是從行道說起後遂說知言養氣不復顧前至末迤迤邐邐說到得百里之地而君之皆能以朝諸侯有天下行一不義殺一不辜而得天下皆不為也却收繳起處

見行可三字近來都說錯了見者示也示人以吾道之可行此之謂見行可即與上文為之兆是一意為之兆者示人以端使知吾道非迂遠而難行也兆足以行而不行者小試其端吾道果非迂遠難行者矣而



人猶不行也

自記

為之兆為之二字緊粘孔子乃是孔子為之兆見行可  
見字即為之字

見行可明朝人都說是視其君可與有為視其臣可與  
共事因此連上節兆字亦說錯魯定公季桓子何嘗  
比列國君臣好來為之兆是做出來使人知吾道之  
非迂濶不可行耳當時抱疑者多以孔子為當年莫  
能究其蘊累世莫能殫其業如晏子之云不知孔子

為中都宰為司寇相夾谷之會那一處不見效

萬章好論古而大抵博觀雜取未能質之於理以得古人之用心故孟子告之以為須此等人纔識得此等人今人論古大槩如矮人觀場莫知其悲笑之所自故惟古人能知古人亦如前之取友云云也作尋常論友便不切

自記

萬章是好古之人一切稗官野史都記許多却不知其人連大禹伊尹孔子都疑惑一番孟子就他長處引

誘他前一節正是起下一節不知古人但觀今人如  
善蓋一鄉始能友善蓋一鄉之士善蓋一國始能友  
善蓋一國之士善蓋天下始能友善蓋天下之士非  
自己身分與之一樣焉能知其人然則尚友古人亦  
須是有古人身分兩面夾出正意作求友說不是以  
上節為友盡鄉國天下之士尤不是

告子便是佛學故孟子辨告子詳於楊墨以其能推性  
命之說也韓氏僅知孟子之闢楊墨不知後世釋氏

之弊於告子辭而闢之無餘蘊矣

自記

問程子謂孟子言性是極本窮源之性既是極本窮源似不應以人物兩兩較量曰然易言繼之者善乃明道所謂人生而靜以上不容說者是極本窮源之性也言成之者性乃明道所謂纔說性時便已不是性者然後人物異而善不善分焉是則孟子言性正就形生神發以後言之

鍾旺

孟子所謂性善者單指人性如是統論萬物一原之性

則不應云異於禽獸幾希違於禽獸不遠且云犬牛  
與人異性犬馬與我不同類矣既是單指人性便是  
以其得氣質之正而為萬物之靈孟子論性又何嘗  
丟了氣質如以人性未必皆善為疑則正是好參尋  
孟子本意處我與堯舜同類不與禽獸同類禽獸做  
不得我我却做得堯舜便是性善何必十成至善而  
後謂之善哉

自記

告子議論許多破綻處孟子不投問抵巇以窮其說而

却似隨其言下酬酢然者須知聖賢本心是欲救援其心術之失非以取勝也我亦欲正人心息邪說距跛行放淫辭以承三聖者豈好辨哉便是其自道處  
自記

杞柳諸章要知孟子節節是開之悟之不是辭之闢之得此意然後諸章之詳畧淺深節節有味今人例作折辨口氣反有許多罅漏處  
自記

杞柳之性水之性人之性只是一性犬之性牛之性却

非人性此孟子善言天命氣質處

自記

此章告子言性之蔽在兩決字亦猶前章之蔽在兩為字既有所矯揉安排則非性矣故孟子以戕賊搏激之說曉之

自記

生之謂性章朱子云以氣言之則知覺運動人與物若不異以理言之則仁義禮智之秉豈物之所得而全哉某看孟子意不如此孟子言你說生就叫做性如白就叫作白麼告子曰然孟子又問凡生都叫做性

如白羽猶白雪白雪猶白玉麼告子又曰然孟子方  
說然則犬之性猶牛牛之性猶人與不分理氣氣亦  
不同犬之知覺運動亦不同于牛牛之知覺運動亦  
不同于人

程朱分理與氣說性覺得孟子不是這樣說孟子却是  
說氣質而理自在其中若分理氣倒像理自理氣自  
氣一般氣中便有理氣有偏全理即差矣如人是立  
生的禽獸是橫生的草木是倒生的便大不同孟子



只說人性故曰性善人形氣與物不同性自與物不同不是說氣同而理異白之謂白猶云凡生皆性與告子曰然羽雪之間恐其謂生與生還有不同也告子又曰然是凡生皆同矣故折之曰然則犬之性猶牛之性牛之性猶人之性與兩節只是一意不是上節言理氣不同下節言氣與氣亦不同也孔子曰性相近也却與孟子說一樣性無不善故曰相近遠者習耳孟子亦云從其大體為大人從其小體為小人

其權在人也大約天地之氣本於天地之理何嘗有  
不善鼓之以雷霆雷霆是好的潤之以風雨風雨亦  
是好的只是人物如何稟得全似天地惟人也具體  
而微到底不能如天地但氣質雖或偏駁而天地之  
性無不有如銀子之成色雖不等然饒使極低畢竟  
陶鍊得銀子出

告子以凡遇長者便長之見義之外及孟子喻之季子  
知有敬之說在吾意中也故發伯兄鄉人之辨以見

凡長者未必敬及以為皆敬而又以為敬如此轉移  
無定可見敬原是在外也轉移無定意在弟與鄉人  
本不當敬處看出即告子吾長楚長之說而加一層  
駁難也

自記

季子初是外長既乃外敬答問間是兩層推究時講總  
以因時制宜一語混過覺辨者解者都沒把鼻

自記

告子之學徑似後來達磨直證無上菩提不立語言文  
字故孟子於儀衍輩不置一詞於楊墨亦不過以無

父無君闢之而已至告子則委曲接引娓娓不倦非  
徒爭勝好辨也杞柳章告子以性原無仁義而可以  
做出仁義來若然則杞柳還可做成棍棒殺人將亦  
以喻性乎孟子恐如此駁他他竟以為可是反助其  
說而開其放誕之端所以只將戕賊二字破他為字  
他亦覺得為湏戕賊說不去因變為湍水之說決東  
則東決西則西未嘗戕賊夫水也不知為惡可以言  
決為善不可以言決但若與他辨決字他便硬說為

善亦湏決所以孟子只順他東西二字跌出上下二字使他自覺得使東西方在上亦不能決之即流也告子因取譬不切遂直指性體以為生之為性孟子不遽斥其非者仁義禮智亦賴知覺運動而行但是生中有性不可謂即生即性耳故問之云生之謂性猶白之謂白與曰然是告子以為即生即性矣孟子又未知其以為生有異類即性亦有異品耶抑凡有生皆即生是性耶故問之云白羽之白猶白雪之白

白雪之白猶白玉之白與曰然是凡有生皆即生是性矣於是與人與犬牛折之而彼乃無辭告子既窮又復變為仁內義外之說者彼以孟子之學總是用外面之義襲取之學以致錯認為性故謂人性雖不同於犬牛以人而論食色可謂非性乎但愛生於心而宜由乎物學者但當求仁不必求義仍是當竭力於內不必分心於外之意蓋佛氏不以仁為非惟不肯認義為內故至今尚有慈悲修善之說孟子折之

若直以子今言仁內何以前言以人性為仁義猶以  
杞柳為桮棬彼將何辭以對孟子却不截斷以為彼  
既以仁為內已屬可喜姑且留下此句只問他何以  
謂義外也及得他彼長而我長之猶彼白而我白之  
之說却當指出敬字來提醒他矣孟子恐怕說出敬  
字他便以長與敬混作一團索性破除槩以為外便  
鏟絕根源所以又藏過敬字只就長字詰問他長馬  
不用敬長人用敬意已隱躍在內又就他彼長而我

長之句摘出長之字曰長者義乎長之者義乎告子  
乃以愛與長為有不同而強分内外夫吾弟固當愛  
何至秦人之弟便不愛假令吾弟飽食無病而秦人  
之弟饑餓濱死則必輟吾弟之食以食之矣豈有不  
愛之理孟子亦姑不與理論只就長之一面駁他災  
之在外猶長之在外也耆之之心在內猶長之之心  
在內也耆秦人之災無以異於耆吾災猶長楚人之  
長亦長吾之長也然則耆災之心亦從外而得與告



子言長楚人之長孟子破之却言耆秦人之災者因彼有不愛秦人之弟之語故用秦人以影切之不但長之非外之理明即秦人之弟之亦當愛其理已隱躍於言中矣孟子季子一章尤為要緊行吾敬故謂之內公都子之言極是但因此季子遂抓住敬字一并破除孟子之駁告子不肯輕易提出敬字正以此耳然季子之意以為所敬在兄而所長在鄉人即將所敬之人放在一邊而別長一人是敬雖可以云內而

不能不掩於鄉人之長長之起於鄉人之長而所長者又非所敬則是由外轉移非內可知其病在不以長為敬故孟子復為兩問逼出彼將曰敬弟彼將曰敬叔父跌明兩敬字然後曰庸敬在兄斯湏之敬在鄉人斯湏之敬在鄉人猶斯湏之敬在弟也鄉人斯湏之敬也為在內則長鄉人之長亦敬也惡得謂在外乎季子至此尚蠻執前見更欲兜底破除以為敬因位而在則敬亦在外公都子乃以飲食亦在外

折之理甚精當直駁到食色性也若以此為在外則食色性也亦在外矣

才字當依程子作氣質說孟子非不知有氣質顧以為天性在人非氣質所得而拘其以不善罪氣質者實非氣質之罪何則就其氣質之所至盡其力而果不足焉然後可以歸之罪耳今人原未嘗竭才而曰未

嘗有才故曰非才之罪也如近講說才字太影響

自記

讀書字字挑剔是孔子正派孔子小象與春秋翻來覆

去不過幾箇字然無窮道理俱在裏面讀詩亦是此  
法如說蒸民之詩只添兩箇故字一箇必字一箇也  
字而語氣已極醒露平常說有物必有則故人秉為  
常性自然好是懿德是將民之秉彝連下句說却是  
錯了夫子言有物必有則是乃人之秉彝也所以好  
是懿德故字顛在下面可知民之秉彝是連有物有  
則說來語意甚妙天生蒸民二句是命民之秉彝是  
性好是懿德是情問上故字作何解曰承天生蒸民

來言不受命而為人則已既有物必有則是如此口  
氣

犬馬之與我不同類自其耳目口體而分故其心性亦  
異禮運董子皆察言之故牛山章所云不可以喻言

看過

自記

牛山章於尚書人心道心中庸已發未發大易消長剝  
復靡不顯闡却只就人心當下指點變前文之雅奧  
躋行路於聖域先儒所謂亞聖之才是也

自記

張程補出氣質之性其實熟看孟子亦不必補孟子曰  
非才之罪也不能盡其才者也非天之降才爾殊也  
才即氣質之性人之才質不同有偏於仁者有偏於  
義禮智者有不足於仁者有不足於義禮智者要未  
有全無仁義禮智及仁義禮智之闕一者也如五味  
調和不鹹是所入之鹽少非全無鹽也不酸是所入  
之梅少非全無梅也人雖才質稍遜奮勵擴充自不  
可限故曰非才之罪人一能之已百之人十能之已

千之雖愚必明雖柔必強此所謂能盡其才者也舍而不求以至相去之遠何嘗自盡其才而乃以罪才乎孟子所說皆是人性不合物性言故曰人皆有不忍人之心今人乍見孺子人之有是四端也人皆有之其好惡與人相近也者幾希是豈人之情也哉天以一理化生萬物物與无妄雖人物所同然人得五行之秀受天地之中所稟之性獨全與天地一般故曰三才如虎狼則但知父子而不知有君臣蜂蟻則

但知君臣而不知有父子惟人雖才質不同皆可反求擴充而得其全故曰聖人與我同類者若犬馬則不與我同類也人性皆善非曰性皆善也人未必盡堯舜然人皆可以為堯舜何也以類同也未有犬馬亦可以為堯舜者聖人先得我心之所同然耳謂之人則理義之心所同然者無不可為堯舜是才質全無權柄何足為累此與孔子性相近習相遠之旨融洽無間特孔子補出上知下愚為更密耳



所息者非氣也仁義之心也平旦又是日夜中氣最清明之頃故所息者至此遂發見耳一念惻隱便是好與人近而為仁之心一念羞惡便是惡與人近而為

義之心

自記

操存舍亡神明不測似乎贊心之神妙而本意則是發

其危微

自記

既云心之官則思則先立兩字似并思字在內蓋必心得其職乃稱立也然注云若能以立之則事無不

思而耳目之欲不能奪之則又似思前更有一段立  
之功夫蓋思是窮理以上便是操持操持者窮理之  
根惟其此心常存是以事至而常能思況心箴有君  
子存誠克念克敬之語則此說是也

自記

無有封而不告繫在交鄰之後蓋存亡繼絕如城楚丘  
之類注所謂專封國邑是也非指本國臣下

自記

養氣章是說理告子篇是說性盡心篇是說命令之則  
窮理盡性以至於命也

論語不說出根來大學撮總說中庸捫底便說出至孟子盡其心者一章說得透徹精到發揮無餘矣周子太極圖說張子西銘皆不過詳細說一番非至周張始發此論也

盡心知性則知天存心養性所以事天天壽不貳修身以俟所以立命說得極平實極精透錫曰此孔子下學而上達義疏也曰然

心是出入無時莫知其鄉的故須存性是無為的故須

養敬以直內倒是存心義以方外倒是養性養性不  
是空空守靜之謂大槩寡欲是存心充無穿窬充無  
欲害人擴充四端却是養性

盡心數章是孟子傳曾思之學之丹頭萬物皆備于我  
句曾思不曾說出註中大則君臣父子小則事物細  
微其當然之理無一不具於性分之內所謂性分即  
仁也故結出仁字曰求仁莫近焉仁者生理君臣父  
子事物細微何者非此誠是箇虛字只是實實有此

即五常信字仁是一箇生意周流滾熱的甚麼道理  
都離這箇不得注將反身而誠兩節分安勉亦好但  
以孟子之意求之似不湏如此說反之於身不自欺  
而自慊仰不愧俯不忤樂莫大焉以心而言也強恕  
而行求仁莫近焉以事而言也恕本不容易子貢曰  
吾亦欲無加諸人程子說無字太自然無字亦與毋  
通況有欲字子貢原未嘗說他已能非爾所及就是  
說此強恕之事何容易言故及其問一言即告之以

恕若恕是子貢所已能夫子曷為告之克伐怨欲不行朱子謂不行到底有在那裏只是不肯形顯出來所以不是仁仁是根株皆盡固是然只就大分上論之亦得仁之體却是生意周流克伐怨欲固然不行其生意流行安在冷冰冰的不見有仁也夫子不肯與人言仁體只教人用心于內苟心內存便自見得生意周流

待文王而後興者凡民也何以不說他人文王終日以

作人為事者也清廟之詩說文王之德最明濟濟多士皆秉文王之德所對越者文王在天之神也所駿奔走者文王在廟之主也

德慧術知術字是所作的事所謂以四術造士孟子亦說術不可不慎也德字在內邊說術字在外邊說內之德有靈慧外之術有智思如以德業對舉一般

安社稷臣只知社稷為重天民却見得百姓要緊要匹夫匹婦無不與被堯舜之澤實實見到天之生斯民

也使先知覺後知使先覺覺後覺一段道理問大人亦不過是天民見解不能更高了曰其根本見識天民與大人一樣只是正已而物正是盡其性則能盡人物之性贊化育參天地天民者正已而正物者也大人者正已而物正者也問社稷臣功豈不及于百姓曰如霍子孟與民休息天下富庶豈無恩澤及民只是起念為安社稷耳即事君人者豈無有益社稷之處只起意為容悅耳問容悅不過是鄙夫孟子為



何與後三項人竝舉曰容悅之臣不是鄙夫如張安世一輩人他亦有他的德行學問但止知事是君則為容悅耳

登東山泰山即孔子登之也截斷孔子二字不得將孔子連下作譬喻亦不得是在借喻作正意斷續其文意觀之耳

自記

登東山而小魯登泰山而小天下凡人亦是如此因孔子有此事而借之以立言耳注中所處者愈高則視

下愈小是說登山不是說孔子

鄭重孔子兩字固是然畢竟東山泰山是何人登孔子  
字逗斷而下方作喻言則文意不順矣以濶字照字  
便當本固非直以為流末而由此以觀本者亦非也  
二字乃水與日月之所以不息處必有本者乃能不  
息不息乃能放乎四海經乎八紘故觀於湍濶繼照  
而其源本可知而為學者之不可以舍乎晝夜明矣

自記

觀水有術節注云此言道之有本也王肯堂曲思成解  
謂聖人之道之本不可見觀言足以知道水與日月  
之本不可見觀瀾與容光則知其本是非言道之有  
本乃是言道有末始足以見本也某向來以為觀水  
其術不一觀其瀾瀾即本也日月有明是其本故容  
光必照焉如此看是觀水之術對容光必照必觀其  
瀾對日月有明兩必字語氣全不相應近思之方得  
其說蓋瀾與容光是水與日月中間一段論水之本

為山澤之氣日月之本為陽陰之精水之極放乎四海日月之極普照萬方今但觀其湍急不已處看其但可受光無不照入處知非有本不能如是本字意在觀水有明內瀾與容光乃對成章意成章非道之本亦非道之極但非有本必不能成章不盈科不行正是此意原泉混混不舍晝夜盈科而後進放乎四海有本者如是可知盈科後行之因有本矣

瀾與照不是大處亦未是本處蓋所由以觀本者但觀

斷港絕潢之水必無滌迴急湍而雷電燭影之光不能幾微畢照則知瀾與照之可以觀本矣蓋有原泉必有混混不舍者有積精必有光景常新者此是有本之驗從此盈科而進便放四海然則光瀾正對成

章自記

無源之水必無瀾瀾者源頭活水來也

自記

聖人之應變無窮處即水之瀾也聖人之無微不入處即容光之照也觀此非有本者能如是乎

鷄鳴而起說到平旦之氣上去便不是猶言五更頭起來做此事便是舜之徒做彼事便是蹠之徒不單是雞鳴時如此從此時做到晚為善為利直是去做不獨是念頭雞鳴而起孳孳為七箇字都同只善利一箇字不同明人若以為利之精神才力去為善就是舜竝無難處乃是孟子緊醒喚人回頭語

丑不是欲孟子貶其高美欲孟子使已幾及其高美耳又非以其立教之高而謂如天不可幾及正謂其立

教之循循有序而苦於高美者速至之無期如天之  
不可幾及耳蓋有好高躡等之病故孟子告之云云  
自記

愛字仁字親字須見得聖賢字眼的實處愛與親本由  
仁出此三字如何分別一視而同仁仁亦可說在物  
上仁親以為寶仁亦可說在親上如何謂愛之弗仁  
仁之弗親愛是在一節上說仁是全體說孟子說箇  
物字禽獸草木皆在內無論犬羊雞豚不忍輕殺布

帛菽粟不敢妄費就是魚蝦之細以至草木瓦石當其用時亦有不忍糟蹋他的念頭至老吾老以及人之老幼吾幼以及人之幼雖有人己之分而老幼總是一般竟與我同類所以下箇仁字仁字已極親切親又是仁之發用最初極醇厚處如有子孝弟為行仁之本之說三字不可說得大相懸遠如時文云愛之而已而仁弗存焉便說不去君子於物非不欲仁也竟待物如民有何不好勢有所不能於民非不欲



親也竟待民如親有何不好勢有所不能盡天下之  
老者而皆為之昏定而晨省冬溫而夏清豈非至願  
其勢能乎不能所惡乎墨氏者為其親為勢不能行  
之教及不能待天下之老者盡如其親反薄其親以  
就之此為可惡耳

天生民而立之君若不為民立君何為孟子一言道盡  
曰得乎丘民而為天子窺見此意覺得湯武之應天  
順人方有把鼻

口之於味章是辨性命之說而所以順性命之理者在其中矣只看兩不謂字可見性也命也之性命是世之所謂性命以氣言者有命焉有性焉之性命是君子所謂性命以理言者有命焉非但貧賤者有定分不可強求即富貴者亦有定分不可踰越此之謂理也性之不與命二命之不與性二是性命之真也以窮其欲者托之性而已非命矣以盡其理者歸之命寧有異性乎要湏看得性命合一則不至惑於嗜慾

氣質之說而性命之理明矣

自記

養心心字是義理之心非但虛靈之心也寡欲是就現

成說其所以寡欲則自持敬克己中來

自記

汝捐問養心莫善於寡欲曰心性情一一分析是宋儒

因異端邪說混為一區牽纏支離學術大亂不得不

如此分析明白孔孟時無此也大槩孟子說心即是

說性如良心仁義之心求放心仁人心也惻隱羞惡

辭讓是非之心都是如此說人心得其正便是道心

明言自堯舜至湯自湯至文王自文王至孔子中間却添出許多見知來則其致意在見知可知矣側重自

是語勢非逆志而為之辭也

自記

由堯舜至於湯章是說道在天地間無有歇時只寬寬說伊尹在莘野便樂堯舜之道太公一出來便與文王為師友何嘗學於湯文且間知亦不消借重見知也

榕村語錄卷六

欽定四庫全書

子部  
榕村語錄卷七

詳校官中書臣閔思毅

編修臣倉聖脈履勘

總校官進士臣繆琪

校對官中書臣王慶長

謄錄監生臣李廷讓

欽定四庫全書

榕村語錄卷七

大學士李光地撰

中庸一

中庸二字程子以不偏不易正道定理詮解固妙但只就道理上說尚該補出箇頭來人性便是道理的頭書云降衷于下民衷即中也若有恒性恒即庸也

理氣先後朱子辨之詳矣乃天命之謂性句注云氣以

成形而理亦賦焉語意似未圓

清植

率性之謂道人多講似孺子入井怛惻生心意思此乃仁之端非道字本位此句只平平說去吾性中有仁率之遂為父子之親吾性中有義率之遂為君臣之義大抵在天謂之命在人謂之性在心則謂性在事則謂道

明代人看書還是王守溪看得是道也者三句人多另看不與下節對只因總注首言道之本原出於天而不可易其實體備於己而不可離遂誤以此三句為

對上節不知道之本原出於天而不可易原只說天命之謂性其實體備於已而不可離便是說率性之謂道道也者節自與下節對惟守溪文是如此

中庸首章注是朱子傳絕學處戒懼謹獨兩節則不用程子之說而竊取濂溪誠幾乾損益等章之意也文集集中庸首章說又以敬以直內義以方外分屬直透下未發已發理益精矣近講多在動靜兩字上下

注脚不知尋到誠明敬義聖學源頭

自記



戒懼慎獨講家多分動靜朱子實無此說靜時可云未  
須省察動時豈得全無存養存養不過將心提起存  
在這裏不獨靜時為然動時亦須提醒以為省察之  
根直內方外亦然內心也敬以直其心徹上徹下無  
所屈撓外事也到得處事均齊停當義是有頭尾的  
敬是無頭尾的致中和節注云自戒懼而約之以至  
於至靜之中無少偏倚而其守不失却將戒懼自動  
處說起如有所感觸而懼自此而收斂之以至于未

發時一無偏倚而工夫不間斷則極其中矣自謹獨而精之以至於應物之處無少差謬而無適不然是自將動處說起自獨知之地省察其善惡至於酬接事物喜怒哀樂無不中節則極其和矣誠明忠恕尊德性道問學以義制事以禮制心存誠謹幾皆是此段話頭知得此義讀儒先書可以一線穿去

問戒慎兩節都是說湏臾否曰湏臾二字正挑剔出不睹不聞來湏臾對見顯是故對故字戒懼對慎獨雙

雙對對不得以湏臾括之戒懼是敬以直內慎獨是  
義以方外當戒懼時只是敬而已初未別出邪正公  
私是非善惡當一念之動便湏自省是公是私是邪  
是正應一事便湏自省正當否有差錯否大抵心貫  
動靜事有終始靜時戒懼之心至應事時依然以此  
為本慎獨則自發念時始至於事已此心便休存養  
省察正是如此

戒懼以心言慎獨以事言提醒此心不使昏放便是存

心然睹聞處此心未必昏放至不睹不聞則放下者  
多矣君子戒懼之功必連此不睹不聞之須臾無不  
透徹然後為密不睹而戒懼則睹可知不聞而恐懼  
則聞可知戒懼是動底字面用此細密工夫見君子  
連這一點都透過了莫見乎隱莫顯乎微言莫以隱  
微為可忽也已所獨知莫見莫顯況由此潛滋暗長  
勢必至如見肺肝顯見須兼此二義方備

戒慎二節不可分動靜道是率性的性乃是人人同有

時時流行的如何可離然謂性不可離便可駭故曰  
道不可離

戒懼節固是以不睹不聞該睹聞然不覩聞者即所謂  
未發之體而性之真也天下之大本在此則敬以直  
之者固所以立天下之大本周子主靜之學所以不  
可訾議者其淵源出於此也

自記

戒慎不睹恐懼不聞若說睹固當戒慎即不睹亦要戒  
慎聞固當恐懼即不聞亦要恐懼轉似不睹不聞是

帶說的雖與上湏臾意合與下大本意却不合將此處說得太重又與湏臾不粘先輩有文甚好先說豈獨睹聞當戒懼即不睹不聞湏臾之頃亦要戒懼此而不戒懼則性命於是乎息矣乃說人勿謂此不睹不聞止湏臾而已萬化之源在焉如之何其可忽耶兩邊都說到

道也者節是在性上做工夫本文却就道字說起故注云道者日用事物當然之理先解釋道字接云皆性

之德而具于心便已引歸到性上又曰無物不有不  
是指道之散在事物者乃緊頂性之德而具於心一  
句言無物不有是性也無物不有是性而性體無時  
而不存此所以不可放肆而離之也自大全小注以  
來解說多錯遂使日用事物當然之理及無物不有  
兩句皆成剩語矣

自記

無物不有無時不然今人都說成無物不有當然之理  
如桌有桌之理椅有椅之理無時不有當然之理如

說話有說話之理飲食有飲食之理却是錯了無物  
不有乃是說性之德我固有之凡人皆然因物亦有  
性故不言人而言物耳其曰無時不然乃是言心之  
體無一刻不流行也人人有之時時有之所以不可  
須臾離須臾離之則性於是斷天命於是息矣豈率  
性之謂哉日用事物當然之理一句已順詮道字恐  
人端在事物上求故緊接皆性之德而具於心已是  
催趲向裏豈有下文轉說向事物之理



問莫見乎隱莫顯乎微曰以大學十目所視十手所指  
對看便明隱暗處也以為暗而莫予見而實十目所  
視可不謂見與微細事也以為細而莫予摘而實十  
手所指可不謂顯與

清植

以敬格天心以恕平物情是中和位育實事朱子語類  
中有此意章句渾涵故人多就虛理上說

自記

致中和天地位焉萬物育焉皆是實事今人只以感應  
虛理言之注中吾之心正天地之心亦正吾之氣順

天地之氣亦順包得大即感應亦在其中心不正則不能收斂安靜勢必攪擾紛更天地如何得位能致中則君君臣臣父父子子天地豈有不位致和則數罟不入斧斤時入月令中許多事件無不按節合拍萬物豈有不育問致中如此說恐與未發有碍曰致中者敬而已矣敬則不至於紛擾其實事是大概定位底意思

君子而時中須如注說而字方通君子之德只是一片

實心而又隨時以處中小人之心是夾夾雜雜義利紛擾而又無所忌憚故世有君子而不必時中者亦有小人而不必至於無所忌憚者隨時處中自然靜時亦中然在事上說的意思多無所忌憚自然行事亦然然在心上說的意思多朱子于君子補出戒懼一層以對無忌憚于小人補出妄行一層以對時中注意不過如此蔡虛齋乃以戒懼為未發時中為已發妄行為已發無所忌憚為未發都是牽強

不明不行由于智愚賢不肖天地間何時無智愚賢不肖安得有明行的時候却是陸子靜說得好因道不明不行所以智愚賢不肖有過不及之差費隱章注說夫婦之知能是一樣聖人之不知能又是一樣亦不如子靜說聖人之不知不能即是夫婦之所知能者為是

道之不行節道字屬上說帝王盛世道行于天下則智者不得過愚者不得不及道明于天下則賢者不得

過不肖者不得及智愚應貼明邊如何貼行賢不肖應貼行邊如何貼明蓋智者聰明有餘好高務遠故以道為不足行聖人教他在行上做工夫行得久纔曉得他底聰明都是虛的其過高處無用愚者智慧少不足於明然敦樸者轉未必不能行理宜充其所長用功于行以勤破愚賢者強力有餘如子路之間斯行諸却能行然行得不甚當他以為行得便了故以道為不足知聖人教他在知上做工夫知得確

纔曉得他行的原有不是不肖雖是不長進却有小  
機智如丹朱之不肖曰啟明非糊塗者只是不向正  
道上走耳既有機智即當用其所長使求明道明得  
透自然見得所行之非亦將歸于正道矣口氣是言  
上之道不行于天下也我確然知其不行矣何也智  
者過之愚者不及也使道行智者焉得過愚者焉得  
不及乎上之道不明于天下也我確然知其不明矣  
何也賢者過之不肖者不及也使道明賢者焉得過

不肖者焉得及乎

非以道之不明不行專歸氣質蓋慨無陶冶氣質者即所謂世教衰民鮮興行是也至末又歎人之不察另

是一層感慨

自記

大知章解者多幹旋一語云舜原不藉資於衆人却仍然好問好察所以為大知看孟子善與人同及若決江河等語却就是這等處為聖人正不必幹旋那一層人惟志氣大故不恥下問要周知不肯自小恥于

問而護短者是志氣小注書之錯如此類者頗多

中立中字就事上見與首章中和畧不同中立不倚只是始終中立耳不必因和而不流句欲作一轉折也

自記

問中庸章段索隱章何故截屬下段曰此章以下承達德而言達道也天下有索隱行怪底人有半塗而廢底人不知道安得隱君子之道費而隱費隱一章正破索隱故曰察察則不隱矣費而隱不是果然隱言



他的隱不是隱是費而隱隱是帶說不可當實字看  
故下文只是說費遠人章是破行怪子臣弟友何怪  
之有故曰庸德庸言庸則不怪矣半途而廢是為外  
物所撓所以富貴貧賤以至夷狄患難不能素位而  
行君子無入不得所以吾弗能已也以下乃言君子  
之道只在卑邇所謂中庸也由妻子而兄弟由兄弟  
而父母即推至於鬼神之微其道總貫為一條而以

誠字結之

清植

講家於索隱章末節以上下句分承兩節實則隱怪固  
非中庸遵道者亦未得所依也半塗者固易乎世而  
有悔心欺世盜名者其本念亦在見知而已每句雙

縮

自記

半塗而廢雖限於力之不足然中庸之道本無難行苟  
用力于是未見有不足者大抵奪於時溺於俗為是  
非毀譽所搖動而自阻者多以其為時俗所搖動而  
自阻則雖謂力之不足可矣此其人雖未必取必於

後世之述而亦不能忘情於當世之知半塗而廢四字中已隱隱有此意故下節遯世不悔語非無根但遯世不見知雖對半塗者說而與後世有述意極相關蓋無以異于人而致其知正是聖道與異端緊對處惟其索隱行怪所以或後世有述惟其依乎中庸是以或遯世不見知也

自記

半塗而廢不言其因何而廢却於下節逗出一句遯世不見知而不悔便可知其病根索隱行怪亦是圖後

世有述總緣名根不斷耳若是世人崇尚遵道彼必  
且依附名義勉強做去若好尚已乖不足邀名彼便  
改而從俗所以廢也

費隱章破索隱道不遠人章破行怪此書以中庸標名  
灼知必有此等人惑世誣民故如此立言費隱章兩  
用察字對隱也不遠人章屢用庸字對怪也費而隱  
語氣猶言道無所謂隱也若言隱乃費而隱耳言隱  
處都是費不是要發明又費又隱隱與費並重也造

端夫婦者此道不知不能者此道察乎天地者亦此  
道其至高遠者即其至卑邇者皆以明其費也注還  
渾成至因侯氏語以與知與能者為舂米炊飯之類  
不知不能者為名物度數之類其意以不知不能若  
說即在日用尋常之中如何喚作聖人惟實以名物  
度數則雖知不能不害為聖人耳豈知如此却說  
不去章首明言君子之道若夫婦之知能不過是舂  
米炊飯聖人之不知不能又是名物度數則是君子

之道都成不緊要的物事而所謂五品之達道豈反  
置之不議不論耶其實夫婦之知能聖人之不知能  
皆指五倫是一事不是兩事造端夫婦已明指出矣  
及其至也其字即承知能之事說不是兩層若說聖  
人於五倫豈有不知不能却大不然堯舜之子不肖  
周公致辟管叔相傳孔子思皆出妻聖人之心未  
必不謂畢竟是我德不足以化之若強於我者自然  
變化有道所謂堯舜猶病都是此意連水旱災荒豈

是天地之心天地亦有不能盡處然則不知不能豈  
虛語耶此道之大便莫載此道之小便莫破上天下  
地無非此理所以孝經云事父孝故事天明事母孝  
故事地察天地明察神明彰矣總言其費無別所謂  
隱也隱字還可以說得故曰費而隱怪字斷說不得  
豈可曰庸而怪乎故只說庸字

費隱章自程門諸公皆有異論蔡西山似亦欲以費隱  
雙關到底見於朱子答書者可推也獨朱子以為通

章皆言道費是已然於隱字却未免另尋頭腦故曰  
所以然者隱而莫之見今只用反跌口氣破除了隱  
字便見費外無隱以斥異端索隱之非似為天成湊  
泊微言莫質恨未得為朱子徒也

自記

費隱章從夫婦知能說到天地若以夫婦之知能為說  
居家之道則天地絪縕萬物化醇乃是最大道理如  
何說語小若說是井臼之類如何又說聖人不知不  
能若以與知能為井臼之類不知能為官禮之類則



子臣弟友之屬乃理中之實體如何都遺落了不知  
夫婦之知能即子臣弟友也聖人之知不能亦子  
臣弟友也一落形器便不能盡道之分孔子不能格  
定哀之非化三家之僭周公不能弭管蔡之亂焉得  
謂盡其分就是天地亦不能盡可見道之費其實妙  
處全在此不能盡上士希賢賢希聖聖希天終身只  
見得趕不上聖人兢兢業業自强不息正是為此天  
行健亦是如此夫子所以說逝者如斯夫不舍晝夜

費而隱費字重讀言道非不隱也乃眼前都是蓋費而  
隱耳道非他即子臣弟友是也諸家錯說之由蓋因  
夫婦之知能若以為子臣弟友則此事不可謂之小  
與語小不符聖人之不知不能若以為子臣弟友又  
恐怕說壞了聖人故以與知能為舂米炊飯之屬以  
不知能為象數名物之屬豈知天地間除了子臣弟  
友更無他道與知能者此也不知能者亦此也日用  
之間瑣碎節目即是小其根極天命至於神化處即

是大此理漫天漫地何有空隙董思白末節文云職  
覆職載皆鳶魚類易知簡能皆飛躍類說得極佳

看書不熟時越看越有奇思湧出到熟後漸漸覺得沒  
有話說某向問陸稼書飛躍即是道否曰不是飛躍  
好的是道翔而後集是道自投羅網不是道某甚喜  
其說今思之不消如此講飛躍便是道自投羅網原  
不是天之所命何須剖白

飛躍未便是察處要看鳶魚亦自離不得夫婦君臣父

子兄弟朋友之理處

上蔡語錄儘可觀但頗雜禪機大約程子語為上蔡所  
記者便似謝為定夫所記者便似游言合其意者便  
記錄記錄時又以己意畧為增損故也鳶飛魚躍注  
中引活潑潑地語便是謝氏所記這本是禪語其實  
滿天塞地都是此理虎狼之父子蜂蟻之君臣誰使  
之然哉故云上下察也至實之理有何活潑潑地之  
可言他本未嘗死何須言活

諸家講察乎天地處補足聖人須云此豈聖人所能盡者如此則費是汙漫無紀之謂可謂大謬矣察者費也言雖造化之大而其道之著察無異於夫婦也天地猶著察如此況聖人乎上文不知不能正見聖人只在費上做工夫

自記

問推之於前而不見其始之合引之於後而不見其終之離者道也中庸乃言君子之道造端乎夫婦及其至也察乎天地然則君子二字不可放過君子之盡

道始於居室之近而其極至於事天明事地察故道無端也君子之道則造端於夫婦耳道無至也君子之道則及其至也察乎天地耳曰正是如此

清植

愛已責人是恒人之心然以此心而愛人責已便是君子之道矣此可見道不遠於人也惟道不遠於人故能推是心者則去道不遠此是通章真血脉張子雖分愛人責已盡仁盡道然總是一箇忠恕總是一箇

君子之道耳

自記

今人說違道不遠與道不遠人口氣寥濶不相聯貫且從違道不遠上推出忠恕未是自然之道然則道不遠人亦在離合之間與伐柯者無異矣捨却對針線路而尋別節旁枝安能使經意愜洽

自記

不遠緊對章旨不遠蓋施已不願之心反而觀之則其則不遠此道所以不遠於人也就此勿施之以推吾自盡之心此所以違道不遠也

自記

盡其道之謂行亦盡其道之謂自得非無往不樂之謂

自記

正己而不求人緊幫在上不陵在下不援不怨不尤緊  
幫無怨皆是申足文意絕不費絲毫層折只于不求  
無怨處轉得分明則不顧外之理心迹俱合矣不求  
又根行素來無怨又根自得來

自記

鬼神非理非氣而在理氣之間在人則心之神明是已  
程張所謂天地造化陰陽二氣者是這箇本文所謂  
祭祀如在者亦是這箇體於人心為人心之鬼神亦



即是這箇認得真便看得活

自記

鬼神雖兼聚散屈伸然體物不遺則其聚也神之格思則其伸也顯處却就聚而伸處見其微也可以謂之散而屈而不可謂之無此理張子正蒙言之詳矣其以鬼為屈以神為伸者又就二物分別字義如此耳實則鬼神皆有屈伸也

自記

鬼神若說向造化便無著即祭祀之鬼神也聖人說道理天人合一若行事不能通神明不謂之盡性倫常

之道盡便郊焉天神格廟焉人鬼饗皆實理實事

問鬼神章曰天神地祇人鬼以至四時五行雨露雷  
一切變化運動無非鬼神充塞宇宙故其性情功效  
為甚盛鬼神本無形聲也然與人心相體而無間焉  
有可遺之處問物即指人心乎曰無物不體人在其  
中但就人心上說易得明白如天命之性萬物同得  
然率性之道却須就人說方明如何見得體物不遺  
但看使天下之人齊明盛服以承祭祀是其性情也

便洋洋乎如其上如其左右是其功效也凡人  
極舒肆時說著神明便竦然此是何故鬼神與體也  
鬼神無間於人心故能使人齊明盛服人心無間於  
鬼神故洋洋如在引詩是證此意以無形無聲言之  
何微也體物不遺又何顯也是皆誠之不可掩也

鬼神章誠字說向天命之性原不錯但覺太深如只就  
氣機應感上說又太淺鬼神却在理氣之間兩說皆  
非恰好分際此段是說率性之道總重在人倫上所

以祭祀節甚要緊祖考之精神便是自家精神可見  
天地之神明便是人之神明所謂體物而不可遺也  
此是實理故曰誠上章妻子和兄弟翁便父母順已  
引其端下數章推說至于格天受命而却詳說祭禮  
此祭祀二字便為伏案

人必和妻子宜兄弟而後可以順父母盡人倫而後可  
以格鬼神此上數章相承之意齊明盛服以承祭祀  
則有如在來格之感矣所謂有其誠則有其神未能

事人焉能事鬼是也修德格天理不過如是但上數章言其理而此下則實以聖人故自大舜文武周公皆盡孝弟以至於誠神動天饗先饗帝者即上順父母格鬼神之實事也

自記

孝是大綱德其一目不當以孝為德然孝德之本大孝非大德而何蓋孝至能格天處方是大也緣此說到

大德受命之理

自記

大孝章若以孝即為德則孝之條件甚多德為聖人句

原只與尊富饗保四句竝列若照王姚江以德為聖  
人為不虧親之體尊富饗保為足顯親之名德又不  
與孝為一且除了孝何者為德下文兩言大德更不  
照管大孝又是何說近看孝經方悟其義孝為德之  
本盡德之量乃完孝之事若但能孝於親而不能始  
於家邦終於四海通於神明光於四海此不過宗族  
鄉黨稱孝而已必愛敬吾親而因以及人親親而仁  
民仁民而愛物以至於明天察地德至此為大德乃

為完孝之事若不愛敬吾親而愛敬他人是無德之本矣又惡足以語德乎見得此意大孝大德方有著落

仁為五常之本孝又為仁之本仁為五常之本者以其為天地生物之心而人得之以為心也孝為仁之本者又以親為吾身所自生良心真切莫先於此也然則孝是德之本修德者必先孝是孝乃德中事然必修德之盡乃能完孝之量而可以名孝則德又是孝

中事矣考經反覆終篇只說此二意此章原是以德  
為大孝之目故前此深闡以孝為德之非正恐礙語  
氣耳豈知二義相為首尾大德不至格天不足以言  
大孝然而舜德之大又豈有大於孝者乎

自記

因材而篤自天申之是指有生而後之天

自記

尊富饗保不過是有天下內事不失顯名亦只從一戎

衣上看出只是咏嘆而盛言之耳

自記

周公成文武之德節講者多以喪葬與祭竝論絕不顧



斯禮也三字語脉

自記

斯禮也只是說祭禮葬是緣祭而及喪服又是緣葬祭而及三者雖俱禮制就此章言之則祭為主喪葬為

賓

自記

父為大夫一段是起下父為士一段語平而意側

上云祖廟下云宗廟者凡大祫時祫皆合食於太祖之廟故將祭而必先修之也若序昭穆于祖廟之中則列宗羣廟之主皆在故又變文為宗廟之禮時解有

妄分兩節為大禘時禘者可嗤

自記

祖廟者太祖之廟宗如殷之三宗周之文武世室是也  
廟則羣昭羣穆皆是無論大禘時禘羣廟之主皆合  
食於太祖之廟故將祭必預修之以為行禮之地故  
也及祭之日羣廟之主皆入祖廟則以昭穆序其位  
次故變祖廟言宗廟宗廟之禮句與序爵序事等句  
一例若以此句籠下則難通踐其位等句指主祭者

說

修其祖廟兩節只是祭之先後次叙如此不必以尊親分配又有分時祫大祫及上節為禮下節為義者皆非也序昭穆謂是子孫之序考之經傳無所證據蓋只是序祖考之昭穆耳

自記

祖廟節是祭前事未祭之前必先洒掃祖廟陳其宗器設其裳衣以及羅致水陸之品皆是要預辦的至祭之時羣廟之主皆入太廟而按昭穆以定其位次惟子孫之賢者有職事然後得在廟中故曰所以辨賢

序爵指助祭者說三句皆當祭時事旅酬則祭將畢而飲福受胙之事既畢復燕之于後寢不敢在廟中故曰樂具入奏以綏後祿諸父兄弟備言燕私

序齒亦是就尊卑行輩序之非畧去尊卑而一以年為主也獻酬當止是主人之子弟行之若賓客之子弟如何亦在廟中

天地祖宗是自吾身推而上的天下民物是自吾身推而廣的上頭高一層則下面濶一層如只推到父母

處則旁濶只是兄弟父母生兄弟者也推到祖宗處則旁濶便有許多族姓祖宗生族姓者也如推到天地處則旁濶便包得民物皆在其中天地生民物者也人不孝於父母祖宗者安能愛兄弟族姓不孝於天地者又安能仁民愛物乎若真能事天地祖宗父母則必能以天地祖宗父母之心為心此治國所以如示諸掌

自記

問政章說仁義禮智處後來孟子董子都如此說覺得

不如夫子之密仁者人得天地生物之心以為心無此則禽獸之不如矣故曰人也無所不親而親親為大義者事理恰當之謂何處不應當理而尊賢為大人倫雖有五父子兄弟皆親親也君臣朋友皆尊賢也一是天性解不開的一是人道差不得的二者盡乎道矣親親之殺尊賢之等今人說是仁有厚薄如父子恩厚至兄弟便稍薄由人及物則愈薄了義有輕重如君臣義重至朋友便稍輕由人及物則愈輕

了不知仁如何說得薄義如何說得輕由父子而兄弟父子全是恩深一本故也兄弟便可理論此道理是自仁而之義至由人及物則鄉隣交關可以閉戶田獲三品可以克庖皆制之以義也由君臣而朋友君臣全是義重至尊故也朋友便可脫畧些形骸是自義而之仁至由人及物則交淺者言而不深獸畜者愛而不敬皆通之於仁也仁義往來而或節之或文之故曰禮所生也此處尊賢泛說與九經不同故

先親親而後尊賢九經則先尊賢而後親親矣君子  
修身以親親為本故曰不可以不事親不明人道所  
從來則不知自別于禽獸將何以事親故又當知人  
繼善成性吾之性即天之性不知此何以知人故又  
當知天此節又是一路推到智上去仁義禮又必以  
智為先也竊疑子思當日是因此一章乃作一部中  
庸故此章前半即是前半部中庸後半即是後半部  
中庸



仁者人也親親為大義者宜也尊賢為大如今將上句  
泛說又宜字說作事物之理下句便不緊切仁者人  
也親親為大即對義說義者宜也尊賢為大即對仁  
說仁在五倫何處不是他貫通大者在親親耳義在  
五倫何處不用他裁制大者在尊賢耳有夫婦而後  
有父子那是頭一層至於父子兄弟皆親親也君臣  
朋友皆尊賢也君擇臣臣亦擇君朋友同德同術勸  
善規過都是尊賢君臣朋友固是義難道父母有過

不廢幾諫兄弟有過垂涕泣而道非義而何到底屬  
仁一邊故曰父慈子孝兄弟怡怡父子兄弟固是仁  
難道君之體臣臣之忠君朋友不相欺負非仁而何  
到底屬義一邊故云合則留不合則去忠告而善道  
之不可則止所以親親之殺不是殺到薄處尊賢之  
等不是等到輕處殺即由仁而之義也等即由義而  
之仁也禮減而進非與禮背所謂進者由禮而之樂  
也樂盈而反非與樂背所謂反者由樂而之禮也

親親尊賢重在親字尊字不如是則仁義有所虧性分有所缺而身不修矣下九經重在親字賢字不如是則根本不固裨補無資而政不舉矣

自記

思修身節如章句說迴應上文理自周密但必欲說尊賢為親親之本則理頗窒碍且使智字意不在知人知字內而反在得人之後講明字內求之密塞而反踈脫矣此節只是疊下文體語類申明言之

自記

夫子說仁義禮又說知天知人便是智是有四件下只

說智仁勇三件後又只說明誠兩件末只歸到誠一件此章兩說一字全不為分解只說到此便住一是道理的頭聖人不欲道破

謙問所以行之者一一者實心也德是得之於心既云達德如何又云行之以實心曰程子謂仁統言之則包四者偏言之則一事仁即是誠但與知對則知在窮理邊說仁在力行邊說而擇之必精執之必固處是勇三者如何不以實心為主無此則三者皆無矣

生安學利分勞逸便錯無教逸欲有邦兢兢業業一日  
二日萬幾何嘗逸來只是生來便識得道理安然而  
行不由父兄戒訓師友督責便是生知安行若因讀  
書感發而求知或因父兄師保責勵而求行便是學  
利從容中道亦是從容而中此道也惟精聖人之生  
知也惟一聖人之安行也精一豈是恬然無事

人家教子弟最先要把不思不勉從容中道與他講明  
非是優游逸獲之謂試觀堯舜之兢業大禹之勤勞

文王之勉勉翼翼夫子之一憤一樂何等惕勵精進  
不如此何以謂之天行健君子以自強不息乎只是  
聖人不待有所策勵勸勉而自能從事於此所謂由  
仁義行非行仁義也若學利則必待策勵勸勉而後  
然困勉則又必困心衡慮徵色發聲而後能作能喻  
耳此最要緊習見之錯入其胸中便為暴棄之根

九經是對哀公說必令其可行奈何講家盡以為天子  
之事如是則惟有天下者用得著有國家者無所用

之既非凡為天下國家語氣且誦此於哀公之前欲何為也無忘賓旅侯邦所申繼絕舉廢治亂持危乃方伯之事至如諸侯無事而相朝使大夫相聘厚往薄來皆邦交之常也注舉為天下者見一隅耳

自記

問不惑與不眩何別曰不惑以見理言是心上事故惑字從心不眩以見事言是目中事故眩字從目尊賢則啟沃有素其見理也明矣敬大臣則謀斷有資其見事也審矣凡目兩視則瞽亂惟專故明古人云人

君之職在擇一相貴專也不然任左右之耳目以為  
察察適足以自眩而已

清植

尊其位重其祿同其好惡是三樣親親之法親之賢者  
則尊其位其餘親屬則重其祿而不任以事再疎屬  
則吉凶相關慶弔必通有無相周而已若就一箇人  
說未有居高位而不食祿者亦未有尊其位重其祿  
而不同其好惡者三句連疊說出下二句幾成贅語  
豫字且莫作先立乎誠說只虛說凡事皆當豫辦以引



起下節耳如要與人說這件事細微曲折當機問答  
如何打點得盡只是大段須豫定凡事亦莫泥定達  
道達德九經之屬問事與行分別曰事即日用間零  
碎待人接物之事行是出之於身而成片段者即親  
義序別之行

問豫是豫立其誠否曰自然是誠若不說誠難道言前  
定是豫先打點許多話待臨時說不成未來的話如  
何打點只是作文字與說書不同如何先說得出誠

字虛齋說下節言立誠以獲上立誠以信友還說得  
去到下文言立誠以誠身立誠以明善便覺槩積牽  
強矣故林次唯知其非而渾之凡事指達道達德九  
經之屬達德內有仁如何說立誠蓋仁是就行事上  
說故曰所以行之者一也

時講以道字括言事行果爾又說箇道字不已贅乎道  
是平時所習之業如六藝之類平常不曾習射習算  
急忙叫他射叫他算自然窮了古人為學不外德行

道藝藝即道也如下三重章以動括言行論語以德之不修括下三項皆不是聖人原分幾款如何以一句包那幾句

誠如孝子事親中心愛敬明便有多少曲折不但是問寢視膳昏定晨省如小杖則受大杖則走事父母幾諫見志不從又敬不違勞而不怨都須分曉苟徒誠而不明是謂愚忠愚孝

某人云先生言頭尾都是誠中間必須明如何曰德性

中原有許多道理只是離了問學却亦不能成就如  
草木便以實結實有何不好必須由根而幹而枝而  
葉而花方能結實但看松子中原有一顆全松蓮子  
中原有一顆全蓮後來根幹枝葉花果都在實內何  
嘗有德性外之問學來掃去問學便是德性受虧陸  
王乃看問學為外事觀此則其學不足闕矣

問博學之一節似不必說是學利事困勉何嘗不如此  
曰然即人一已百人十已千以困勉視學利如此學

利視生安亦是如此以困勉視學利是愚柔學利視生安亦是愚柔博學之一節只是說擇善固執

問是問人辨是自己辨別非與人辨也問如何是慎思明辨曰思無不通如天之理應當知其所以然却去想到機祥禍福術數上便是不慎慎是斂而歸之于正明辨又是辨於幾微疑似之間如兩說皆善却辨得一更善者方是至善

榕村語錄卷七